

57. Gaayi Njiin ku leen masa xam mbaa nga gis ka sopp jëmmëm
Am teraanga "yowma zihaam" génn min "Xusaarati"
58. Yáll na Buur saxal nu ci gëm te jubal nu yoon wu di jëm
"hiliyiina daaru nahiim" "maha Seydi saadaati"
59. "Wa salaatu maha salaam" "Han nabiiy xayri la naam"
"Zumma aali laysa yariim" "Abadan wa sahbati"

BISMI LAAHI RAHMAANI RAHIIMI

Gëm woolu leen Imaamuna..... (1954)

1. "Alhamdu li Xaalixinaa Wa sukru li Raasixinaa"
"Zumma salatu Rabināa Alaa Nabi safiihinaa"
2. Xerawlu leen ma deeti woy Imaamu laay mi jara woy
"Marsiya" Seydi Ruuhu laahi jantub ngënëél ba suuxina
3. Gëm wóólu leen Imaamunaa te wóólu Seydi Ruuhunaa
Ibnu Imaamul Asanaa ndax Yàlla fey nu aljana
4. Nan gëm te xamne Seydina Limaamu may nga yaatu na
Lu jiitu feeñ ga nekka na ci Ngor di jaamu Rabbana
5. Limaamu nee na jullikay booba ñuy wax ca Ngor ne mooy
Bu Seydina Xaliilu laay am na fay at yu yàgg na
6. Lu paase junniy at yu wóór guddi gu nekk mungay wër
Adina bii ci bepp boor lepp di seetlu adina
7. Limaamu nee ba mu naree feeñ seet na xeet wi lu bari
Gisul lu ëpp sutura lébu ci xeeti adina
8. Moo tax mu feeñ ca ñoom di woo Adina peñku ak sowu
Nit ak jinne la boole woo naa jaamu leen "Xaalixunaa"
- X 9. Bésuub dimaas la mbir ma ñiëw ca moom mu yekkati ca kaw
"Kalaama tahmiidin" ca kaw di sànta Laahu Rabbanaa
10. Naa jant feeñ na yeewu leen "Wa xaala naasu waal ixwaan"
jinne ka jàpp sangi leen ko "fi awsaani jaddinaa"
- X 11. Nijaay ja dem ca mbaar ma took waa mbaar ma naa ko bu fi took
Fajal Limaamu doora took sa doom ju baax ja jommi na
12. Nijaay ja ñiëw Limaamu naa waa péñc mooma ñu nga naa
Limaamu dof na jommi na da ñoo gëlëm "fi amrinaa"
13. Mbir yi ci man soo ko bëggée xam wutal yóbal te jógge
Yoof jublul Màkk boo yeggee ne leen amna kook jommi na
14. Limaamu moodi aw turam làq na "ar bahjina aam"
Man dey yeém naa ci ay mbiram koon ñu soloo la "amri naa"
15. Nijaay ja ne ko lott naa ci loolu "xaala Seydina
Limaamu, "ijlis indi naa laa tastamih juhaala naa"

16. Mu woo bàjjenam ba ñu daan woowe maam Adama te naan
Ko sànge ma ñaari malaan yu weex te gëm Xaalixunaa
17. Te xam ne Yàll miy Boroom jox na la doom judul moroom
Adina lee ñu xam Limaam aw ma moroom ci àdina
18. Te woo jigéenam ba ñu daan wooye Njaay Jaw te dellu naan
Ko sànge ma ñaari malaan yu yees te santa Rabbanaa
19. Te xam ni Laahu miy dogal jox na la mag ju mu joxul
kenn ci àdina kudul yow awma kem ci àdina
20. Woo ñaari soxnaam ya ne leen yék leen ne Yàlla joxna leen
Tanneef na ngeen bég sànt leen Yàllaa ko def miy Rabbanaa
21. Taxaw di woote illa Laahi nit ak jinne la woo li Laahi
Naa "aajibuu dahiya Laahi" Yàlla ma yónni ci àdina
22. Naa lii ma wax kuka fi wax ren doo ka wax déwén te sax
Suuf dina xar ne la dariix nga réér mbindeefi àdina
23. Daldi tamal kërëm sikar guddéék bëccék jigéen ak góór
La wax ba xol ya bokk fuur ci Laahu miy "Xaalixunaa"
24. Buur yàlla dal di kay defal Xarbaax yu réy yu nu gisul
ku ka fi def ginnaaw Rasóol "aleyhi salli Rabbanaa"
25. Gëtt ga dal di ñëw ci ñoom ay taalibéém ku ne ca ñoom
kurus ga xeeñ na ak Limaam ci lac koloñi Ajana
26. Limaamu Laay ku masa ñëw fa moom ak say daraja sew
Ndax dala naa ef nga di niiw dootoo xamati àdina
27. Ba saa yu ko soobe mu ñëw aki mbirëm mu jók ca kaw
Gëlëm di laaj gaa ña ka yéew te naa man day man waaru naa
28. Gaa ña ka gëm di teew mu jók Limaamu daldi yékki sak
bamu yoroon ca ñoom mu yék ni Njool ma mooy Mahdiyuna
29. Mu mujj naa ka yaa Imaam Yaa Seydina amoo moroom
Ku am moroom du sa moroom "Alxawsu yaay Imaamunaa"
30. Baay Njiin amoon na fi malaan moo xam ne porjal mu ñu daan
Naw bu ñëwée sàngoo malaan ma dootu dem naa lott naa
31. Ku weddi laajal ba Limaam yónnéé Ndakaarub taalibéém
Bu ñuy wax Moór Binta te moom booba dooleem ja yéemu na
32. Ba mu njëlóó mu juum yobbaa le na malaan ma dem ba paase
Yoof ba doon julli suba sàngoo ko lépp fátte na
33. Foofa la daldi rot ci suuf ca suba am ñu jógee Yoof
Doon dem Ndakaaru seen mu bóóf foofa ñu yéém ilaahanaa
34. Ñu ñëw soloo ko Seydina Limaamu njool ma yékkina
malaan ma waaja jók te naa Subhaana Laahi Rabbinaa

35. Ku weddi laajal gaafi doon tawat fa moom ngir gééj ga doon
Baawaan ca kër ga Njiin ne leen ñew leen ñu ñaan Ilaahanaa
36. Limaamu àndak gaafi dem ba ca tefes rèddu rèddam
Naa yeena réér nde gééj gi xam na ni ma mel fi Rabbina
37. Kerook la gééj ga mujj dem ca kër ga gaa ña doora xam
Ni Baay Libaas amul moroom ay muhjisaatam yééme na
38. Ku weddi laajal taalibeem ba Njiin doon yedd tax ba moom
mu mer ba naa man maa ngi dem "Axdimu li ixwaani naa"
39. Mu daldi yanu waxandeem Imaamu Laay ni gaa ñi ndeem
Tajkaam bi jók na foofu dem du ma Imaamu Rabbinaa
40. Mu yanu yan ba di taxaw ca suba ba ngoon mu taxaw
Ba ñépp tédde mu taxaw yii muhjisaat kay yéemu na
41. Ca xaaju guddi Njoolma ñew ca moon ne ka ëf mu nelaw
Ba mu jógee ca suba ñew naa "tuftu yaa Imaamanaa"
42. Ku weddi laajal ba Damméél ma ñuy wax Sàmb Lawbe Faal
yónnee ndawam ni ko demal Yoof ca Imaamu Rabbinaa
43. Soo ka gisee ni ko Dammeel ne gént na ba jàq lool
ca la mu gis te kat waxul ndawla ludul neel gént naa
44. Libaas ni ndaw la boo delloo ngane Dammeel ba mu jullee
Gee Tamxarit ja la julli ñaari rakka ci "yaa sinaa"
45. Rakk bu nekk jànga na ca juróom ñaari "yaa sinaa"
Ginnaaw Faatiha yééné na ca "istixaari Rabbinaa"
46. Ba mu téddee la gént gis ñu jox ko ñatti mbuus yu fees
Dellak deret te lii du jaas moom la gisoon ba jàq naa
47. Mu séddale réew ma ñu naan ca menna moom dong mu naan
Menna ma, loolu la doon yónnéé di laaj "fi fathinaa"
48. Yii muhjisaat mosu nu ko gis dégu nu ku ka jagoo
Ginnaaw ba Yonnen ba sangoo suuf ñibbi néegi aljanaa
49. Njiin boo yoree metit ba ñew bu ca tegee térxam la yaw
Dootoo yék fu mitit wa aw nga mujj naa ko sànta naa
50. Limaamu daana taxawal ku mosula dal baa ni waxal
Muy nittali mbiri Rasuul yi fi ñewóón ci àdina
51. Baa saa yu ka soobee mu ñew neko noppil fa mu taxaw
Dootu fa xam dara ñu ñew naa yaa Imaam lii yéemu na
52. Yii muhjisaat mosu nu koo gis dégu nu ku ko jagoo
Ginnaaw ba Yonnen ba sangoo suuf ñibbi neegi aljanaa
53. Ku weddi laajal gaaya doon iñaan di jéema fey, la Njiin
Taal Seydina Imaam ne leen Yàlla ko taal te tàkk na

54. Ñu boole kaak tubaab ba naa Limaamul Mahdiyu mi leen
Di folli mooma sàŋki leen ko ndax ngannaayam bari na
55. Limaamu nee samay ngànnay mooy ñaan Rahmaan ki yor ngànnay
Te sax Rasoolu ne ngànnay yal jullit ñaan “ilaahanaa”
56. Gaa ñaa ngay gën di jaxase nasaraan bay gën di xase
Te naa leen bés bu ñu tasee dootul tudd ti Rabbanaa
57. Fekk na Baay Njiin ne na woon ay taalibeem kufi ñēwoon
Naa da may reytam bu kenn jók bayyi leen maak Rabbana
58. Ñu naa ka yaa Imaama laay dunu muñ loolu, Imaama laay
naa “tawakaltu ala Laahi” Wakiirlu naa ci Rabbanaa
59. Gaa ñay diisoo ci ay mbirēm ñii naa bu nu aggee ca moom
Na nu ko sàŋki ñii ne ñoom na nu ko làqi àdinaa
60. Ba ñu ñēwee ca Maam Libaas te àndaak noonam ba ni jaas
Ma Samba koki mu ngay xas na leen Limaamu sàŋkuna
61. Bañam ya génñ di seetaan noonam ya génñ di reetaan
Da ñoo xamul booba ne Njiin Yàllaa ko yékki kawé na
62. Ñu fekk gaa ña di sikar ñuy laaj ani ki leen sikar
Loo gaa ña naa munga ca kër ga mooy Imaamu Rabbinaa
63. Am ca ku génñé jaasi ju ñaw toj kër ga fekk Njiin taxaw
Doyloo Boroomam mi ci kaw ak suuf di sànta Rabbanaa
64. Ba mu ñēwee la daldi taal Limaamu naa ka bul sonnal
Sa bopp tek loxaam mu dal di fey mu tiit ba jàq naa
65. Mu daldi génñé fitalam goo xamni wax na ñu ne ñoom
Ken du ka tul ba ku mu jam nga daldi génñ àdina
66. Limaamu daldi kay dēngél nopp ba naa ka fitalal
Mu téq ñetti yoon tàkkul mu génñék ceen ndax jàq naa
67. Ba mu ceenee la Imaamu Laay ni Laa ilaaha illa Laahu
Mohammad Rasuulu Laahi mu rot ca suuf lii yéemu na
68. Mu song Njiin fa mu taxaw Limaamu yékki ka ca kaw
Dóór ka ci suuf ba gaaña yéew ko di werante damma na
69. Ba mu jógee la war ci kaw faswa di yuuxu daldi dawal
Ba mu yeggee muy wax ca kaw kooka du nit moom yéemu na
70. Tubaab ya bokk tiit ba seen buur jàpp bés ngir dem ca Njiin
Sērīñ Ndakaaru dem ne leen “huwa Limaamu, aqu naa”
71. Kaay leen ñu ànd ba ca moom ba ñu aggee mu ne Limaamu
Bàyyil sa taalibéyi dem te jàpp Laahu Rabbanaa
72. Limaamu naa leen li ma wax du déñ da ngeen gumba te tēx
Da ngeen defe man ngeena tax ma bàyyi ñii ne “aamana”

73. Keroog la jàpp Seydinaa Isaa ne leen man dey xam naa
Ni kuy mbindééf ci àdina di na wuyyu ji Rabbanaa
74. Bu ma fi Yàlla jëlée te lii may wax matul gis leen xale
Bile koy mottali te lii de wóór na fii ci àdina
75. Keroog la gàddaay ba béréb bu ñuy wax Malika ci garab
Gu ñuy wax ngejj Njiin ne ab tarjkaam du weesu "haa unaa"
76. Limaamu naa leen Yàlla Buur bi kat digël na nu nu woor
Ñu naa ko lu nuy doge koor gi yaa Imaamu Rabbinaa
77. Njiin ne xanaa soow ma Rasóolu doge woon kooram mooy "usuul"
Ne tuut Sam Penda ak Siré Taal nuyóó waxam ja dëgg na
78. Kii yor gambab meew kii ngi yor bu mbaanik naa ko li nu wër
Yàllaay gindee nde koon ñu far dellu béréb bi làqu na
79. Tubaab ba daldi nay sonal waa réew ma naa leen fumu dal
Na ngeen ko gis mbaa ma mbugël leen léegi fii ci adina
80. Gaa ñaa ngay wër ba sonna lool "tusuur" ñu romba fa mu dal
Manu ñu koo gis Yàlla daal moo yor kiiraay yuy làqu na
81. Baay Njiin yërëm leen ngir ga moom xolam ba yaa na yërmëndéém
ja réy na mootax ba Limaamu yónnéé ca ñoom ngir wóolu na
82. "Salaasa aayaamin" la Njiin am foofa gaa ñi yeewu leen
Xool bés ya Xayrul Aalamiin amoon ca "Haari zawrinaa"
83. Waxtuw tàkusaan jot Baay Libaas di jàpp gaa ña bëgg gis
njañam la kéwél dal ni jaas ca foofu yii mbir yéemu na
84. Gaa ña booloo ñoom nëpp daw doon dàq kéwél ga mu aw
Ca seen biir gaa ña dem ba ñew fekk Limaamu jàpp na
85. Ñu boole réccu ak nàqar jàppu ñu kéwél ga fekk far
Limaamu jàpp na ba muur njañam lay sànta Rabbanaa
86. Limaamu àndak gaa ña dem Tubaab ya naa Wiir Wiir la jëm
Xool leen, ku bëgg xool Limaam dootu fi ñew ci àdina
87. Libaas ne gaa ña mu àndal su ngeen séénatul maawi gaal
Gi koon xam leen du ma kamaal du ma Imaamu Rabbinaa
88. Gaal ga di dem noon ya di ree waaye ba mu àggee Goree
Kuy taalibee Njiin dalna ree ngir mukjisaatam yéemu na
89. Melax ya xuy na ba ngilaw ya riddi yënguy Raad ya ñew
Toj taax ya làbbe yëpp daw naa kii xarbaaxam yeemu na
90. Ba seen làbbe ba daldi yor aw yat di dóór ca taax ya ser
naa doomi Yàlla bu mu mer koon Yàlla mer miy Rabba naa
91. Ñu naa Limaam danoo bëggoon nga dellu Maam Limaam ne leen
Dootu ma dellu gaa ña naan way fu nu jëm ci àdina

92. Fekkoon ñu jàppab taalibéém Tafsiir Ablaay Jallo, Limaam
Ne leen balaa ma dellu moom mu dellu kii kay wóolu na
93. Limaamu nee na budul woon ak taalibeem ba, du fanaan
Béér, waayi ñatti weer la Njiin am Béér di sànta Rabbanaa
94. Ñu naa ka yaa Limaam waxal ñi la jaxaseek nun nu dal
di leen mbugël, mbugël yudul teggiku fii ci àdina
95. Libaas ne leen jéggël naa leen da ñoo gëlëm, te réére Njiin
Ndé koon du ñu iñaane Njiin man dey doylloo naa Rabbanaa
96. Amoon na ndawsu ñëw ca Béér ba jaaxal leen ngir di leen waar
Libaas ne ëf ndawsa mu ser naa maay seytaanes àdina
97. Ba mu delloo fa mu daloon ñu ne leen ndawsa dee na yeen
Ñi doon werante yeewu leen Njiin du moroom ci àdina
98. Xerawlu leen xabaar bu yéém, waa ju ñëwoon ca Maam Limaam
Te naa damaa déggi mbirëm ma bëgg tuub man wóolu na
99. Fekkoon na lenni taalibéém tukki jandeer mu àndak ñoom
Ba ñu ñëwee ba ca Limaam fekk ñuy tudd Rabbanaa
100. Limaamu naa leen yeen ñile, bu kenn laaleek waa jile
Ku mu jigeen nga yàqule Alaaxiraak ci àdina
101. Ba Njiin jullée ba noppi ñëw ca waa ja tek loxoom ca kaw
bopp ba naa ka foo fi aw ba ñëw fi, waa ja jàq na
102. Waa jaa nga ser di yuux ca kaw te naa man dey sééréér bu beew
Laa sunu baax, rey nit ci kaw tooñ lépp waa ja nēbbu na
103. Ndeke seytaane la su ñëw naroon yàqa manla aw
Fu Njiin xamul moo tax mu ñëw naa damay tuub man wóolu naa
104. Ba mu delloo fa mu dalloon ñu ne leen waa ja dee na yéen
Ñi doon werante yeewu leen Njiin du moroom ci àdina
105. Yaw mi ne xaabal nga bu baax toogal te xam ne lii nga wax
mook as ci gééja yam du tax ba gééj gi jéex ci àdina
106. Toogal te nopalu te xam ni muhjisaati Njiin du yam
Mooy gééj xameesul fu mu yam kudul Alaahu Rabbanaa
107. Sëriñ Maxtaar ne jéema lim xarbaaxi Njiin ak bëgg lim
Ginaaxi géjj ñoo bokk yam Yalla ko xam miy Rubbu naa
108. Limaamu daa na leen beyal seen tool ya leen gënë soxal
Doo yëk ludul doon xéysi tool gis tool ba jéex lii yéemu na
109. Te gaa ña Njiin yabal ca tool ya ñoom du ñu sonna te tool
Bu jéex ñu gis bu kenn béyul ba ñu ne leen jànt so na
110. Limaamu mooy toggì ñamam jox gaa ña, mooy wutam ndoxam
te ka gënë bañ Njiin la Limaam daa defal lii, kii yéemu na

111. Ku mosa feebar ñëw ca Njiin, ku mosa jàq ñëw ca Njiin
Ku mosa jaaxle ba ñëw ca Njiin kontaan ba naa ko sànta naa
112. Ku doggu Njiin, Njiin jokku ko, ku xañ Njiin Baay Njiin jox na ko
ku ko tooñit mu jéggal ko, gii góór mbiram kay yéemu na
113. Lii la Libaas saxoo te moom la daa digël ay taalibéém
Naa leen na ngeen jaamu Boroom mbindééf yi moo di Rabbunaa
114. Mag ak ndawak góorak jigéen la Maam Libaas ne jaamu leen
Te lumu digle it moo leen ca raw ba génñ àdina
115. Bés ba ñu nee Njiin génñé na àdina ñépp jaaxle na
Te fekk Isaa tukki na rééwi Kajoór, lii jaaxle na
116. Te ñu waxoon Isaay jullée Mahdiyu ndeem jók na fa, lee
Tax ñépp jaaxle ndeke lii di na leen bir ci àdina
117. Seydina Manjona daldi jël jaasi ne ndeem Isaa ñëwul
Ku rob Imaamu Laay pareel sa bos, dootoo nê àdina
118. Ca ñetti fan ya la Isaa ñëw romb labbe ya ñu sape naa
da ñuy teeru Isaa tey jii lay wàcc àdina
119. Seydi ne nun ñi tudd Isaa nan julli nun te dem ca saasi
labbe baa nganaa Isaa minu doon seet kat wàcc na
120. Mu bàyyi labbe ya yaraax ñuy bàcc soor ya ca yaraax
Mu ñëw jullée, gééj ga neex kérook ba ñépp waaru na
121. Mu daldi wuutu Maam Libaas daldi dëggël la Maam Libaas
Ne woon Issay wuutu palaas bi mooy matal "dahwatanaa"
122. Seydi Isaa daldi taxaw yékëti diine ja ca kaw
Luy bëgg xotiku mu ñaw ba ñépp naa kii yéemu na
123. Tubaab ya jox ko kólléré pullaar ya naa ko éy goree
Wolof ya naa ko yaa goree, amoo mooroom ci àdina
124. Araab ya tampeel ka mu ñëw Al Haaji Balla Silwi ñëw
Naa "Ruuhu laahi" nga ken du yaw Makkaa la jox lii kawé na
125. Sariif Saadix moo la ko jox, neena Limaamoo ka ka jox
Moomit mu noon naa la ka jox, sa mey yu rëy yi yéemu naa
126. Tubaab ya jox ka ay medaay muy kólléréém ba naa ko kaay
Nu dem Faraans ngir yaa nu doy loo ñaan nu mey la jaadu na
127. Moom la Libaas Ñañ woy "ajal" Tubaab ya woo Seydi dugël
Ko néég bu yiw ngir ne bégël Seydeek njabootam jaadu na
128. Baay Seydina ku mosa ñëw fa moom ak say daraja sew
Loo am am it màxaama sew ngir martabaam ba kawé na
129. Ku weddi loolu na nga laaj teerub ministar ba nga laaj
Birob boroom Ndar ba ujaaj yaak sërifi sépp dajé na

130. Guvernóór ne leen bu kenna yor mbaxane te bu kenna yor
Meteel kerook Seydée fa yor kaalaam ca biir lii yéémé na
131. Wuutu na Njiin ñeen fukki at jullée ka, wóór la dikle yit
Naa leen "ibaadaat" yi na mat sax leen ci jaamu Rabbana
132. Seydi digël nay taalibeem tabax jumaa Yoof doora dem
ndekete njoolmaay dem wuyuji Laahu Rabbanaa
133. Xamne ku Yàlla mosa woo nga bàyyi mébët foo bawoo
Moo tax mu bàyyi fii mu bawoo ngën ji mébët ba ñibbi naa
134. At ma Boroomam nee ko yaw tàggul njaboot gi te nga ñëw
Seydi naa ko yaa Rabbi yaw "Iq fir lanaa zunuubanaa"
135. Boroomam ne ko na nga laaj booleel njaboot gi te nga laaj
Seydi ne leen tey maa ngi laaj jot leen ruuyi ci àdina.
136. Keroog ku teew dal na jiyaar jiyaari nafsini la jiyaar
Ba Seydi nee gaa ñi jiyaar leen tey "fii amri Rabbinaa"
137. Keroog lu teewul ak lu teew la gaa ña joxe ba ne seew
moomoom àdinaak li mu yéew ba jox ko Seydi Ruuhunaa
138. Keroog jambaar ya daldi feñ Ba Seydi naa leen yeen ñi feñ
Ak gaa ñu feñul séeni añ mooy béél èllék ca ajanaa
139. "Isriina alfan" moom la Mor jox Seydi naa ko yaa ko jar
keroog ba Seydi daldi yor rajoba naa ko sàntanaa
140. Te lii de wóór na ku fa teew ba Seydi nee gaa ña ko yéew
"Jiyaari nafsini" la nu yéew "fal yubalix haadirunaa".
141. Ci "aama Aasasin" (1367) la laaj ciw kori naa gaa ña mu laaj
Xam ngeen ne yeen mosu ma laaj lii day ndigël la fii Rabbana
142. Ba koriwa délsée la aj "sakin" (27) ca weer ca la aj
Bàyyi nu mel ni ku ñu téj cib kaso Njool ma ñibbi na
143. Ci "aama hassasin" (1368) la dem bàyyi dunyaa ci ak lëndëm
Ñu naa ko Ruuhu yaa ngi dem ku nuy làqooti ci àdina.
144. Ku mosa tiit làqu fa moom Tubaab ya xam na la fa moom
Daawu ñu ka sànjaafu moom mooy garmi Seydi yéémé na
145. Ñu rééróó ñëw mu defare ku ñaan mu mey la lu bare
Nga muji naa ka yaa gore Ruuhu sa mbir sax yéemu na
146. Tubaab ya jox ko "kurwa" "Lasin donóór" te masla waaxu
ngir liggéyal leen ñu waa xu ñoom ba yob ko Seydinaa
147. Mooy garmi Baay Seydi du maas ba tax làbbe ba ca Farans
Yónnéey ndawam jox leeni paas fiuy seetsi Seydi Ruuhunaa
148. Ñu ñëw ba Kambareen ñu naan fileey màkaanam waaye seen
xel yépp Yàlla muur na leen ñu muji réér ci Seydinaa

149. Naka ku wànnent di mana xoole jàntub njolloor ba nasaraan
di xam Baay Seydinaa miy samsu diine Rabbinaa
150. Tubaab ya jox ko sawetaas ba boo réyoon boroom Farans
Ñu ceen la Baay Seydi ne jaas nga mucc kii kay yéémé na
151. Ku tooñ mu jéggël du ka taaj di yedd, du gëddë ku laaj
Moo tax ba waa ju mosa waaj ngir laajsi Seydi doyle na
152. Du xastewaate, te du jëw, du ɗaññ kenn mooy ku yiw
Moo tax ku kay xas aka jëw bàyyil te xamni alkuna
153. Ku mosa tumuranke ñëw mu ñaan nga wér kii yéému na
Te soo yoree mitit ba ñëw mu ñaan nga wér kii yéému na
154. Donna na leer ga ca Limaam donna na tab ga ca Limaam
Booleek ngënëél ya woon ca moom jànta la woon ci àdina
155. Mooy “samsu lisaamil muniir” ñëw na ba dem te Yàlla muur
Xoli mbindééf yi ba ñu réér ci Seydinaa ba làqu na
156. Jàntub lisaam ba suuxi na kenu lisaam ba fàq na
Moo gore xol ba yaatu na Séydéy tanneefal Rabbanaa
157. Ku mosa tiit ba jàq lool ba gis ka xol ba daldi dal
Séydéy di gaynde mooy kamaal booleek lewet ba yéému na
158. Jàlóórëy Ruuhu Séydinaa maneesu koo lim bare na
koon, te ma laal ci Séydinaa Manjoon mi fi gën fi “dahrinaa”
159. Bés ba ñu nee Isaa fanaan na Jàmmlaa yi Kàmbareen
Budul woon ak Seydi Manjoon njaqare rey waa àdina
160. Seydi Manjoona daldi ñëw mu mel ni Baay Séydéé taxaw
Ak ñaari kaalaam ya ca kaw te naa na ngeen gëm Rabbanaa
161. Moom am na ndam ci diine ngir topp na Ruuhu laahi “arbahiina
aam” moodi gor te mosul la geesu àdina
162. Moo tax ba Yàlla jox na kay ngënëél ak muhjisaat yu réy
Buur Yàlla sax nee dina fëy way muñ ëllëk ca aljana
163. Njanaaw la ñëw na ca Manjoon ba ñépp yéém Seydi Manjoon
Gééj balla teen ba ñépp naan ca ndox ma lii kay yéému na
164. Noppi na moon te dékluwul waxi rambaaj ya dekluwul
Kuy yàq mootax muy Kamaal amul moroom “fi dahrinaa”
165. Yàl na ko Buur Yàlla saxal te yalna buur Yàlla guddël
Fanam ci àdina te xol yi boka jaamu Rabbanaa
166. Ma wax fi tuut ci Séydina Abaabakar bun Séydinaa
Imaamu Laay sudwatunaa” moo jara woy ba ajana
167. Limaamu sol na kay ngënëél seetal ba mu ka nee jàngal
Ma leetar bii te naa waxal ca kaw ba mbir ma jaxle na

168. Baay Seydina Mbaya nga naa Limaamu man kat jaaxlenaa
Ndax mosu ma firi xanaa Allaahu mooy "Faatihunaa"
169. Imaamu Laahi ne ko yaw ndax man nga wax baat yi ca kaw
Mu naa ko waaw tey wax ca kaw Njiin di firi lii yéemu na
170. Limaamu jàngal ko yeneen Leetar ba am bés ndaw leneen
Ñeww èndi ab leetar ca Njiin fekk mbooloo ma daje naa
171. Njiin jox ko leetar ba te naa ko jàngal lépp Séydinaa
Mbay jànga leetar ba ba naa defaraat fii déy jaadu na
172. Njiin ne aalim ya ndax xam ngeen kii fu mu jàngé gaa ña naan
Mosu nu koo yék Njiin ne leen tey ngeen ko xam "fii xawlinaa"
173. Njiin ne ku laaj ku la jàngal neel sama baay a ma jàngal
ku laaj sa baay ku ko jàngal neel Yàll miy xaalixunaa
174. Imaamu laahi mi mosul dal baa ak siina ko jàngal
Njiin kay kaka jàngal dadul nit waaye jànga naa
175. Ginnaaw ga lay doora laxas di jàngi Seydi Mbay du maas
"huwal faxiihu" bul xiyaas am nay ngénéél ba yéemu naa
176. Xérawlu leen "yaa ehlenaa" ma wax ci doomi Séydinaa
Isaaji tuut ndax yella na te mooy sëtub Imaamanaa
177. Xolam ba yaa na tabe na am nay teggin te gore na
donna na baayam Seydinaa Isaa ci ngor gok yéemu naa
178. Mooy Seydi Abdalahi moom dundal na diiné ji te moom
Wurus la boo seetee mbirëm doo wax ludul moom sellana
179. Du boddi ken te du ñëkkël kanam ku ñëw da lay bégël
Yaatal la joxla am ndimmël ba nga bék naa ko sàntanaa
180. Dem na ba aji Beyti laay wuyyu Boroomam badi Laahi
"Labayka yaa Rabbi wa Laahi" di sànta foofa Rabbanaa
181. "hamdan wa nihmatan" la wax te tek ca "labay ka" bu baax
Naa Rabbi yaa ko moom te sax "Laa sirka fiika Rabbanaa"
182. Nuyyu na kaabatal haraam def ñaari rakka ca maxaam
Yàlla ne ku taxaw maxaam "Li Laahi kaana aaminaa"
183. Taxaw na doju harafaat ba am fa ay "maarifaa"
yoo xamne lèntóón na ba faat ci leeni "Ulamaainaa"
184. Def na "tawaafan lil xudóóm "Isaa afadtum" la Boroom
Xuran digël Ujaaj ya ñoom tek sikru Laahi Rabbinaa
185. Daw na Safaa ak Marwata fanaan na Musdaalifata
Sànni na jambaraaya taasuleen ci doomi Séydinaa
186. Dem na siyaare xayru naas fekk na xabrub xayru naas
Masor ya wër ko di ko baas xolam ba neex ngir wóolu na

187. Ngir li mu bàyyi Jamma Laay Masor ya baase ko wa Laahi
Mu dem siyaar Rasóólu Laay xolam ba dem ci Imaamana
188. Ngir moo waxoon ni sama jéf ndéém wuute naak Ngēnji mbindééf
ci lenn ciy wax aki jéf duma Imaamu Rabbinaa
189. Siyaare na xayrul Aalimiin sukk na ca rawdul Amiin
Tabloba-doynal Aalamiin ñu xamne moodi xayrunaa
190. “Maa bayna min bari” la wax Hadiis ba dem na ba ne sax
Ku fa taxaw ba wër ka sax yaa nga ca dēri aljana
191. Ne amna lumu laaj ku ñuy wax Saalihan ca foofa mooy
Ka leen dalal mu wax lu doy, ci Seydi Ruuhu Rabbinaa
192. Laajal sēriñ ba, moo demoon la ñu waxante “fiil màkaan”
“Laysal xabaru kal hayaan” maa gis du yemmook dégg naa
193. Ajna siyaar na moodi “aas” demul siyaari ngir turu aas
Ay darajaam jiitu na aas “minal xadiimi Rabbinaa”
194. Isaa ma jur doy na màxaam Limamu moodi sama maam
Tiitar du weesu foofu moom am nay ngēnéél ba yéemu na
195. Bul fàtte seyxi Raan mi aw tǎŋki Lamaamu moom du jēw
Du ɗaŋŋ kenn mooy ku yiw xoolul lu jēm ci àdina
196. Ku jaamu Yàlla miy Boroom mu daldi kay def askanam
Ku dēddu Yàlla miy Boroom dootu ko xool ci àdina
197. Boo ko gisee mu daldi lay digël ci Yàlla mooy ki doy
Te boo worul ndax daldi kay def, Yàlla fay la aljana
198. Seetal ma Seydi Caw magam ka donna maamam ci tabeem
Xolam ba yaana muñ na moom xoolul lu jēm ci àdina
199. Mànduna, muñ na mooy ku doy “Bun” Seydinaa Manjoon te muy
Sétēb Imaamu Laahi miy “xudwatŋa li Rabbinaa”
200. Yalna fi Buur Yàlla saxal kenuy lislām yi te jubēl
Njaboot gi ndax Yàlla bégel nu, nu dēkaale aljana
201. Yalna na Buur Yàlla yērēm yalna nu Buur Yàlla gērēm
Yalna nu Yàlla may i ndam èllék te may nu aljana
202. Yalna nu Buur Yàlla jubēl Yalna nu Buur Yàlla jàmmal
Yalna nu Buur Yàlla musēl Alaaxiraak ci Adinaa
203. Yalna nu Buur Yàlla bégel Yalna nu Buur Yàlla xelal
Yalna nu Buur Yàlla xamal “xayra Uloomi Rabbinaa”
204. “Suma salaatu wa salaam alaa Nabii xayri lanaam”
“Wal aali wa sahbil kiraam Maadama mulku Rabbinaa”